

# Bekalan air semua empangan cukup

Masih berada dalam keadaan baik melebihi 60 peratus, tiada cadangan laksana catuan air

■ SYAIRI SHAARI

**SHAH ALAM** - Kapasiti takungan semua empangan di Selangor masih berada dalam keadaan baik melebihi paras 60 peratus biarpun dalam musim El-Nino.

Exco Infrastruktur dan Kemudahan Awam, Pemodelan Pertanian dan Industri Asas Tani, Zaidy Abdul Talib berkata, walaupun kapasiti air di kesemua empangan negeri dalam keadaan baik, kerajaan negeri telah dan sedang melaksanakan beberapa langkah mitigasi untuk menghadapi musim kering yang melanda.

"Antara langkah-langkah diambil seperti melaksanakan operasi pembenihan awan seperti yang dilaksanakan pada tahun lalu di beberapa kawasan tadahan dan lembangan sungai bagi meningkatkan



**ZAIDY**

kuantiti sumber air.

"Pelaksanaan operasi bagi 2016 telah bermula pada 16 Januari lalu dan dijalankan sebanyak dua kali setiap hari," katanya dalam satu kenyataan kepada Sinar Harian.

Zaidy berkata, langkah lain adalah meneruskan dan menguruskan operasi pengepaman air dari kolam takungan di sekitar Bestari Jaya tanpa



**Kerajaan negeri telah dan sedang melaksanakan beberapa langkah mitigasi untuk menghadapi musim kering yang melanda sekarang ini.**

mengabaikan soal kualiti sumber air tersebut.

Katanya, operasi pengepaman bermula pada 8 Januari lalu dan jumlah pengeluaran ditingkatkan sehingga 500 juta liter sehari (JLH).

Dalam pada sama, Adun Templer itu berkata, pihaknya akan mengawal pelepasan air empangan bagi memastikan pelepasan dilaksanakan secara optimum dengan mengambil kira sumber air sedia ada.

"Selain itu, pengepaman air daripada Empangan Semenyih ke Langat yang dianggarkan sebanyak 70 JLH dilakukan untuk memastikan sumber air mencukupi bagi loji pembersihan air (LPA) Sungai Langat dan

mengurangkan kebergantungan kepada pelepasan air daripada Empangan Langat.

"Turut dilakukan ialah menyalurkan air dari terowong Langat 2 ke Sungai Langat yang bertujuan untuk memberdaya ketahanan Sungai Langat untuk LPA Sungai Langat, Bukit Tampo dan Cheras Batu 11. Penyaluran sebanyak 300 JLH ini akan diaktifkan apabila kapasiti Empangan Langat menecah 45 peratus," katanya.

Tambah beliau, bagi mengelakkan pencemaran mangan dan ammonia dalam sungai, pihaknya menyediakan sumber air tambahan melalui dua kolam warta Orang Asli di Sepang untuk kegunaan LPA Bukit Tampo.

Zaidy berkata, Kerajaan Selangor tidak bercadang melaksanakan catuan bekalan air buat masa ini.